

Oqaluuserisassanut nassuiaat (Inatsisartut Siulittaasuat)

Aallaqqaasiutigalugu oqaatigissavara Inatsisartut ataatsimiinneranni oqaluuserisassanik oqaluuserinninnermi ileqqorissaarnermut najoqqutassaqarmat. Taannalu malillugu nalunaarutigineqartut pillugit naammagittaalliuutit siulittaasoqarfimmut allakkatigut nassiunneqartassammata. Aamma Inatsisartuni ilaasortanut tamanut eqqaasitsissutigissavara avammut ammasumik Inatsisartut siulittaasoqarfianik isorinninnermik saqqummiussisoqartannginnissaat. Tamanna Siulittaasoqarfimmik ataqqinninnermik ersersitsinissaq aammalu Inatsisartunik isiginninnerup sernissorneqarnissaa pillugu.

Aamma erseqqissaassutigineqassaaq ataatsimiititaliat siulittaasoqarfimmut suliata ataasiakkaat pillugit kinguartitsinissamik qinnuteqaraangata apeqqusernagit akuerineqartarput. Tamanna ataatsimiititaliap immikkoortunik sularinninnerani innarlerneqarnani aammalu malittarisassat malillugit sulisinnaaniassammat.

Imm. 44: “Uunga siunnersuut: Inissianik attartorneq pillugu Inatsisartut inatsisaat”, *Ineqarnermut, Attaveqaasersuutitut, Isorliunerusunut Upalungaarsimanermullu Naalakkersuisoq*, Naalakkersuisunit qinnutigineqartoq naapertorlugu UKA2026-mut kinguartinneqarpoq.

Ilaqutariinnermut Peqqissutsimullu Ataatsimiititaliamit qinnutigineqartoq naapertorlugu imm. 169-ip: “Naartunermi, erninnermi meeravissiararnermilu sulinngiffeqartarneq pillugu anaanaasut tamarmik

sapaatip akunneranut akunnernik 40-nik erninerminnik, sapaatit akunnerini 19-ini, siornatigut suliffigisimasaq apeqqutaatinnagu ullormusiaqarnissaasa pisinnaatitaaffigilernissaannut, Inatsisartut inatsisaasa allanngortinnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut”, *Inatsisartunut ilaasortaq Jens NapãtôK’, Naleraq*, aappassaaneerneqarnissaa juunip 2-nut kinguartinneqarpoq.

Imm. 206-ip: “Tunumi aalisarnerup ineriartortinneqaqqinnissaa pillugu apeqquteqaat aallaavigalugu oqallinnissamik siunnersuut”, *Inatsisartunut ilaasortaq Lars Poulsen, Siumut*, sammineqarnissaa ullormut allamut kinguartinneqarpoq. Ulloq nutaaq nittartakkakut saqqummiunneqarumarpoq.

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliamit qinnutigineqartoq naapertorlugu imm. 61-ip: “Siunissami pisariaqartitsinerup qulakkeerneqarnissaa siunertaralugu Ilisimatusarfimmi ilinniarfeqarfiup illutaatalu annertusineqarneranni aningaasaqarnikkut allaffissornikkullu kingunerisassat misissorneqarnerannik imaqartumik nassuiaasiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaammut atatillugu sukumiisumik misissorneqassaaq, danskit nunanilu allani aningaasaateqarfiit assigisaallu aningaasalersorneranut akuutinneqarsinnaanersut. Nassuiaat Inatsisartunut agguanneqassaaq 1. januar 2027 nallertinnagu”, *Demokraatit inatsisartuni eqimattaa*, aappassaaneerneqarnissaa kinguartinneqarpoq. Aappassaaneerneqarnissaanut ulloq nutaaq nittartakkakut saqqummiunneqarumarpoq.

Taasisarnerit pillugit uku akornanni isumaqatigiissuteqartoqarpoq:
